



**Komunikadu Imprensa**

**29 Maiu 2020**

## **JSMP Lansa relatóriu Anuál 2019 Progresu no dezafiu sira iha setór justisa no lejislativu**

Hanesan tinan sira uluk, Judicial System Monitoring Programme (JSMP) normalmente lansá relatóriu anual observaun jerál ba setór justisa no lejislativu. Iha períodu tinan ida ne'e, JSMP mós lansá relatóriu annual tinan 2019 hodi públika rezultadu monitorizasaun sira kona-ba dezvoltamentu importante, progresu no dezafiu sira iha setór justisa no mós iha setór lejislativu ba entidade sira relevante no públiku. Ida ne'e hanesan forma ida hodi kontribui ba ha' diak no reforsa setór importante rua ne'e.

“JSMP hein katak relatóriu rua ne'e bele fornese informasaun útil ba públiku iha jerál no partikularmente órgaun no instituisaun Estadu relevante sira. JSMP mós hein katak instituisaun relevante sira ne'e bele konsidera rekomendasaun sira iha relatóriu ne'e hodi hadi'ak funsionamentu setór justisa formál no lejislativu iha futuru,” dehan Sra. Ana Paula Marçal, Diretora Ezekutiva JSMP.

Relatóriu Observasaun Jerál Setór Judisiáriu subliña kona-ba progresu no dezafiu sira iha setór justisa nian, elabora kazu sira ne'ebé julga iha tribunál sira, hanesan krime violénsia doméstika, violasaun seksuál, krime ho natureza ezersisiu funsaun públiku ne'ebé tribunál julga ona. Iha parte ikus, relatóriu ne'e inklui estatística kazu sira ne'ebé julga iha tribunál distritál sira no Tribunál Rekursu durante tinan 2019.

Enkuantu relatóriu Observasaun Parlamentár konstitui informasaun ne'ebé JSMP deskobre durante tinan 2019, partikularmente observaun crítica ba situaun polítika iha Timor-Leste, Produtividade Parlamentu iha tinan 2019, progresu no dezafiu sira iha serbisu lejislativu inklui pontualidade deputadu sira nian.

Kestaun seluk mós kona-ba levantamentu imunidade iha Parlamentu Nasionál ba deputadu sira ne'ebé prevee iha Rejimentu Parlamentu nian no mos kestaun sira relasiona ho funsionamentu Parlamentu Nasionál nian, inklui kestaun sira hanesan kanselamentu ba viajen Prezidente Repúblika nian ba rai li'ur no rejisaun Orsamentu Jerál Estadu 2020 ne'ebé hetan xumba hosi Parlamentu Nasionál.

Relatóriu ne'e konklui ho rekomendasaun importante no relevante balun ne'ebé sei dirije direktamente ba órgaun no instituisaun kompentente no relevante sira atu bele tau iha konsiderasaun.

JSMP rekoñese katak lansamentu ba relatóriu rua ne'e la tuir tempu hanesan tinan sira kotuk tanba situaun Covid-2019 ne'ebé afeta globalmente inklui Timor-Leste.

Mezmu nune'e, JSMP iha komitmentu nafatin hodi lansa relatóriu hirak ne'e liuhusi *online* no sei la envolve parseiru sira.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

[info@jsmp.tl](mailto:info@jsmp.tl)

Website: <http://jsmp.tl>